



愛嬌的代價

有一寡人生做𧸒仔面，看著比同年的人較幼齒，猶毋過，嘛有人老起來等，自細漢就比別人較臭老，這攏是隨人的基因。不而過，這馬醫學美容遮爾發達，真濟人大只的銀票捧咧去揣醫生，有的欲做目睺重巡；有的欲共鼻仔龍骨疊較懸咧；有的欲共國字面削做瓜子面……當然，逐項攏著愛開錢，閣毋是小可仔錢爾爾，莫怪醫美診所滿滿是，病院的醫生走去美容整形中心，共人點斑、搨皮、抽油、做假奶……

早前猶未有雷射的技術，一寡查某人去開刀搨皮，無細膩割著微神經，煞連欲笑欲哭都無法度自由。新聞定定放送，某乜人去抽油煞感染著蜂岫癰；某乜人割重巡割一下目睺大細蕊；某乜人面肉內底埋線煞變成貓仔面，毋敢出門閣愛開錢拍官司，真正是無枷夯傀儡。

為著好奇，我捌去共烏斑、烏痣點掉，嘛捌買診所推銷的產品。遐的醫美業者攏足有喙水，緊紹介診所內底貴參參的療程：搨皮一擺幾萬箍，後擺兩三年著愛閣來一擺，若無就會走山。聽聽咧，我共伊講：「我轉去考慮看覓咧！」就阿婆仔閩港矣。彼五千箍當做開眼界的學費，若欲閣開五萬、五十萬，有影開袂落去。

天公伯仔到底是共變老的機關安佇人身上的啥物所在？是按怎我若看著「美魔女」，毋管伊的面抹甲佻白、頭毛染甲佻烏、腰束奶嘜尻川閣有砵砵，毋過伊的目神是無法度瞞人的啦。

廣告的魔力誠厲害，我嘛捌看著醫美診所的廣告，綴人去注『肉毒桿菌』的射，想欲共額頭的皺紋熨予平。結果，足足半年變殭屍面，連目眉嘛無法度振動。等到目眉會當振動的時陣，皺紋又閣走出來矣。真正是落雨天沃花——無彩工。

生做歹看毋是好空的代誌，毋過愛嬌敢著愛開大錢？做人善良樂暢好笑神、食食天然閣清氣、環境衛生空氣好、家己加減學一寡掠龍順血路的功夫，人若健康就會嬌。若是開大錢討皮疼，閣舞甲拍官司起相告，按呢就算袂和囉。

作者：黃琬芸

☆詞彙學習☆

【臭老】tshàu-lāu：老相、老態。形容一個人的外表看起來比實際年齡老。

【只】tsí：計算成疊紙張的單位。

【重巡】tîng-sûn：雙眼皮。

【癰】ing：病名。一種範圍較大的惡性膿瘡，為皮膚及皮下組織發炎化膿引起，局部紅腫疼痛。

【無枷夯傀儡】Bô kê già ka-lé：比喻自找麻煩。

【走山】tsáu-suann：因為地震、山崩或土石流等災害而導致山區地形移動、改變。

【阿婆仔閩港】A-pô--á làng-káng：意指落跑、偷溜或逃走。

【樂暢】lòk-thiòng：歡喜、愉快。

【食食】tsiáh-sit：飲食。